

## **Skupština Kantona Sarajevo**

Admela Hodžić, zastupnica u Skupštini Kantona Sarajevo

Sarajevo, 19.12.2023. godine

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

N/r predsjedavajućeg

Vlada Kantona Sarajevo

N/r premijera

Kantonalna uprava civilne zaštite Kantona Sarajevo

### **ZASTUPNIČKA INICIJATIVA**

Na osnovu čl. 106 i 213. stav (1) Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka) podnosim inicijativu Vladi Kantona Sarajevo i Kntonalnoj upravi civilne zaštite Kantona Sarajevo da se sredstva planirana u Budžetu Kantonalne uprave civilne zaštite Kantona Sarajevo za 2023. godinu, sa stavke 614300 - Tekući transferi neprofitnim organizacijama UAN004 Tekući transferi vatrogasnim društvima u iznosu od 200.000 KM isplati vatrogasnim društvima sa područja Kantona Sarajevo.

U Budžetu Kantona Sarajevo za 2023. godinu su planirana gore navedena sredstva, ali do danas nisu isplaćena, pa se ova inicijativa može smatrati hitnom obzirom na današnji datum.

### **OBRAZLOŽENJE**

U Kantonu Sarajevo aktivno djeluje 8 vatrogasnih društava i to vatrogasna društva: Vratnik, Bjelave, Vogošća, Novo Sarajevo 1934, Alipašin Most, Ilidža, Tarčin i Trnovo. Sva vatrogasna društva su članice Vatrogasnog saveza Kantona Sarajevo i u svim vatrogasnim društvima su formirane dobrovoljne vatrogasne jedinice koje broje oko 200 vatrogasaca. Vatrogasna društva su opremljena sa 42 vatrogasna vozila i svom potrebnom vatrogasnom opremom za gašenje požara i za sva druga spašavanja. Skupština Kantona Sarajevo je donijela Budžet za 2023. godinu i u Budžetu Kantonalne uprave civilne zaštite na stavci 614300 UAN 004 - Tekući transferi vatrogasnim društvima planirano je 200.000 KM budžetskih sredstava za vatrogasna društva sa područja Kantona Sarajevo. Međutim ni do danas Kantonalna uprava civilne zaštite nije prebacila planirana sredstva vatrogasnim

društvima. Iako je prema članu 84. Zakona o zaštiti od požara i vatrogastvu (“Službene novine Federacije BiH” broj: 64/09) Kanton dužan da finansira vatrogasna društva jer sva Vatrogasna društva imaju obavezu gašenja požara i u Zakonu o zaštiti od požara i vatrogastvu i u Planu zaštite od požara Kantona Sarajevo koji je usvojila Skupština Kantona Sarajevo.

**ZAKON**  
**O ZAŠTITI OD POŽARA I VATROGASTVU**  
*(„Službene novine Federacije BiH“, br. 64/09)*

**Član 81.**

Dobrovoljno vatrogasno društvo iz člana 80. ovog zakona, može, u okviru svoje djelatnosti, u oblasti zaštite od požara učestvovati u vršenju poslova zaštite od požara i vatrogastva koji se odnose na provođenje određenih preventivnih mjera zaštite od požara koje društvo može provoditi; gašenje požara i spašavanja ljudi i materijalnih dobara ugroženih požarom ili eksplozijama; propagiranje zaštite od požara i vatrogastva i vršenja drugih zadataka u vezi sa zaštitom od požara; ostvarivanja saradnje sa odgojnim i obrazovnim institucijama i nadležnim organima uprave u poslovima razvoja svijesti o zaštiti od požara i vatrogastva i sa tim institucijama i organima ili samostalno provoditi stručna savjetovanja i seminare i druge oblike informativno - propagandne aktivnosti od značaja za vatrogasnu djelatnost i zaštitu od požara, a posebno u sticanju i širenju vatrogasne i opće kulture stanovništva o pitanjima zaštite od požara i kulture i značaja zaštite okoliša, te mogu davati inicijative za rješavanje određenih pitanja u planu zaštite od požara općine i grada, odnosno kantona, radi unapređenja preventive u oblasti zaštite od požara i vatrogastva i ostvarivanje saradnje sa vladinim i nevladinim sektorom, kao i pravnim i fizičkim licima radi ostvarivanja ciljeva iz ove odredbe. Statutom dobrovoljnog vatrogasnog društva određuju se poslovi iz stava 1. ovog člana koje će obavljati to društvo, a što se određuje prema kadrovskim, materijalnim i drugim uslovima kojima raspolaže vatrogasno društvo.

**Član 82.**

Ukoliko se na osnovu procjene ugroženosti od požara općine ili grada, odnosno kantona i njihovih planova zaštite od požara ukaže potreba za formiranje dobrovoljnih vatrogasnih jedinica, vatrogasna društva mogu osnovati dobrovoljnu vatrogasnu jedinicu veličine odjeljenja, voda ili čete, ako raspolažu kadrovskim, materijalnim i drugim uslovima koji su potrebni za rad te jedinice, što se rješava u dogovoru sa organom uprave civilne zaštite općine, grada, odnosno kantona.

Ako je planom zaštite od požara općine, odnosno grada ili kantona, predviđeno da se u određenim dobrovoljnim vatrogasnim društvima osniva dobrovoljna vatrogasna jedinica, ta vatrogasna društva su dužna, pod uslovima iz stava 1. ovog člana, osnovati tu jedinicu u

roku koji je utvrđen u planu zaštite od požara što osigurava organ uprave civilne zaštite općine, grada ili kantona. U tom slučaju finansijska i druga sredstva potrebna za rad te vatrogasne jedinice, osigurava općina, odnosno grad ili kanton što mora biti utvrđeno u tom planu zaštite od požara.

Dobrovoljne vatrogasne jedinice iz st. 1. i 2. ovog člana osnivaju se i osposobljavaju za gašenje požara i zaštitu od požara, po pravilu, na: šumama i šumskom zemljištu, na poljoprivrednim površinama, stambenim, gospodarskim i javnim objektima i prevoznim sredstvima.

Osnivanje i rad dobrovoljne vatrogasne jedinice iz st. 1. i 2. ovog člana, vrši se pod neposrednim nadzorom i uputama profesionalne vatrogasne jedinice općine, grada odnosno kantona na čijem području jedinica djeluje.

#### **Član 84.**

Kanton, općine, odnosno grad i pravna lica i druge institucije mogu materijalno i na drugi način pomagati dobrovoljno vatrogasno društvo u obavljanju poslova iz njihove nadležnosti koji su utvrđeni u čl. 81. i 82. ovog zakona.

**Ako su planom zaštite od požara općine, odnosno grada ili kantona utvrđene određene obaveze za dobrovoljna vatrogasna društva, odnosno za dobrovoljne vatrogasne jedinice u gašenju požara i spašavanju ljudi i materijalnih dobara ugroženih požarom ili eksplozijom, općina i grad odnosno kanton su DUŽNI tom vatrogasnom društvu, odnosno dobrovoljnoj vatrogasnoj jedinici osigurati sredstva potrebna za realizaciju zadataka koji su utvrđeni u tom planu zaštite od požara.**

Također je i članom 135. tačka 8. Zakona o zaštiti od požara i vatrogastvu utvrđena obaveza Kantona da finansira vatrogasna društva.

#### **Član 135.**

##### **Kanton finansira:**

**8) pružanje pomoći dobrovoljnim vatrogasnim društvima osnovanim na području kantona za finansiranje određenih poslova iz njihove nadležnosti od značaja za zaštitu od požara i vatrogastvo, a posebno za finansiranje dobrovoljnih vatrogasnih jedinica osnovanih u tim društvima.**

U Zakonu o izvršenju Budžeta Kantona Sarajevo u članu 22. stav (2) je regulisano je da se za pitanja kojim je regulisano finansiranje udruženja posebnim zakonom ne primjenjuje dodjela Javnim pozivom.

#### **Član 22.**

(Sredstva za finansiranje političkih partija, koalicija, nezavisnih kandidata, parlamentarnih grupa i **udruženja**)

(2) Sredstva za finansiranje udruženja izvršavaće se u okviru razdjela ministarstava na osnovu Javnog poziva, a po kriterijima koji su utvrđeni propisom Vlade, **osim ukoliko je ovo pitanje propisano posebnim zakonom za pojedine oblasti.**

Prema tome ova sredstva se mogu dodjeliti vatrogasnim društvima bez Javnog poziva. Na taj način Grad Sarajevo i općine dodjeljuju sredstva svojim vatrogasnim društvima sa iste stavke bez Javnog poziva, kao i druge kantonalne uprave civilne zaštite u Federaciji BiH. Samo rukovodstvo Kantonalne uprave civilne zaštite Kantona Sarajevo kaže da ne postoji zakonski osnov za dodjelu sredstava vatrogasnim društvima tj. ne poštuju zakone koji regulišu ovu oblast.

Kantonalna uprava civilne zaštite Kantona Sarajevo time što ne prebacuje planirana sredstva vatrogasnim društvima dovodi u opasnost da ista ostanu bez sredstva za finansiranje njihove djelatnosti čime dovode u opasnost građane Kantona Sarajevo, jer su vatrogasna društva pored Profesionalne vatrogasne jedinice Kantonalne uprave civilne zaštite garant protivpožarne sigurnosti građana i materijalnih dobara na području Kantona Sarajevo.

Kolika je važnost vatrogasnih društava pokazuje i to koliko su imali intervencija po pozivu Kantonalne uprave civilne zaštite Kantona Sarajevo. Vatrogasna društva su u 2023. godini na poziv Kantonalne uprave civilne zaštite što samostalno što kao ispomoć Profesionalnoj brigade imali 156 intervencija, na kojima je učestvovalo 642 vatrogasaca. Na tim intervencijama je utrošeno 1214 radnih sati.

Osim tih intervencija vatrogasna društva su na poziv građana vršili i sljedeće poslove:

- Gašenje požara;
- Prevoz vode u naselja koja nemaju stabilno snabdjevanje vodom;
- Sječa drveća i uklanjanje istih sa saobraćajnica;
- Ispumpavanja vode;
- Obezbjedenja kulturnih i sportskih manifestacija;
- Čišćenje vodotokova;
- Košenje trave po obalama Miljacke;
- Javne vježbe;
- Predavanja iz protivpožarne zaštite u školama i mjesnim zajednicama;
- Stalno dežurstvo u vatrogasnim domovima i dr.

Ukupan broj intervencija u 2023. godini je iznosio oko 1.200 intervencija.

Osim troškova proizašlih iz navedenih intervencija vatrogasna društva su imala i sljedeće troškove:

- Troškovi registracija 42 vatrogasna vozila;
- Kominalni troškovi;
- Troškovi održavanja 8 vatrogasnih domova;
- Troškovi za gorivo;
- Troškovi održavanja vatrogasnih vozila;
- Troškovi toplog obroka;
- Troškovi za dnevnicu za intervencije i dežurstva;
- Troškovi za platu za 11 zaposlenih vatrogasaca;
- Troškovi za nabavku sredstava za gašenje;
- Troškovi za nabavku opreme;
- I drugi troškovi.

Zbog svih navedenih troškova koja su imala vatrogasna društva podnosim ovu inicijativu, odnosno za hitno prebacivanje sredstva planirana Budžetom. Iznos od oko 200.000 KM je minimalan jer time na dvadesetčetverosatnom raspolaganju dobijamo 200 dobrovoljnih vatrogasaca sa svim vozilima i opremom, pa tako dolazimo do podatka da jedan dobrovoljni vatrogasac košta 1.000 KM za godinu dana što je posebno povoljno za Kanton, no ni to do danas nisu mogli ostvariti.

Ukoliko im se ne dodijele Budžetom planirana sredstva postoji opasnost da vatrogasna društva moraju prestati sa svojim aktivnostima zbog nedostatka finansijskih sredstava, što bi bilo pogubno po građane Kantona Sarajevo.

Ukoliko se ne prebace odobrena sredstva vatrogasnim društvima postaje bespredmetno to što Vlada i Skupština planira ta sredstva u Budžetu Kantona Sarajevo, jer im se nije omogućilo korištenje Zakonom predviđenih sredstava koja su odobrena od strane Skupštine Kantona Sarajevo, te realno postoji mogućnost za utvrđivanje individualne odgovornosti ukoliko jedan ljudski život dovedemo u pitanje zbog kršenja Zakona.

Podatke koje sam koristila u svojoj inicijativi sam dobila od Vatrogasnog saveza Kantona Sarajevo i svih 8 vatrogasnih društava sa područja Kantona Sarajevo.

Admela Hodžić

Samostalna zastupnica u Skupštini Kantona Sarajevo